

KUPOTEA

Nani amepotea?

Ni nini husababisha mtu apotee?

Je! Watoto wamezaliwa wamepotea?

Je! Ni nini suluhiho la kupotea?

Je! Wengine watapotea milele?

Kupotea ni Nini?

Tafakari kwa kina kwa muda kuhusiana na dhana ya kupotea. Katika lugha ya Kiingereza “kupotea” kunafasiliwa kama: “ni hali ya kupotea.” Hali ya kupotea inaweza kuogofya! Msafiri katika msitu mnene anaweza kujichanganya na apotee asiijue njia. Eropleni inaweza kuanguka porini huku waokoaji wasijue namna ya kuwafikia abiria. Yusufu na Mariamu walikwenda Yerusalem kuabudu na kisha kurudi nyumbani, lakini wakarejea tena huko walipogundua walimpoteza Yesu (Luka 2:41-51). Walipomwona Yesu, Mariamu aauliza: “Mwanangu, mbona umetutenda hivi? Tazama, baba yako na mimi tulikuwa tukikutafuta kwa huzuni kubwa” (Luka 2:48 ESV).

Kwa kuangalia mazingira, hali ya kupotea inaweza ikawa ya muda mfupi au ya kudumu. Mara nyingi hatima ya kupotea ni maangamizi!

Sisi tutakazia zaidi hali ya kupotea kiroho. Tungependelea kutoa majibu ya Biblia kwa maswali kadha wa kadha. Ni nani aliypotea kiroho? Kwanini wanadamu hujikuta katika hali hii ya hatari? Jinsi gani tunaweza kutatua tatizo hilo? Kitu gani kitawapata hao wote watakaobakia hali ya kupotea?

Nani Amepotea?

Njia bora ya kubaini nani alipotea kwanza ni kuainisha mambo yaliyomfanya mtu huyo apotee. Adamu na Hawa, wanandoa wawili wa kwanza (taz. Marko 10:6), waliumbwa wakiwa wanyoofu. Muumba wao mwema aliwakirimia chakula wapate kuishi. Hata hivyo, aliwaonya: “Matunda ya mti wa ujuzi wa mema na mabaya usile, kwa maana siku utakapokula matunda ya mti huo utakufa hakika” (Mwanzo 2:17). Ni dhahiri, walipewa uchaguzi, vilevile walielezwa nini kingefuata kama wangechagua kutotii. Kwa bahati mbaya, Hawa “akatwaa katika matunda yake akala, akampa na mumewe, naye akala” (Mwanzo 3:6). Basi kitu gani kiliwapata?

Naam, kwa kuwa Mungu hawezi kusema uongo (Tito 1:2), walifika na madhira yaliyotokana na uasi, madhara ambayo waliambiwa yangewapata. Walikufa! Hili huwachanganya wengi, kwa sababu “siku zote za Adamu alizoishi ni miaka mia kenda na thelathini; naye akafa” (Mwanzo 5:5). Adamu aliishi muda mrefu baada ya kula matunda. Kimsingi mkanganyiko hutoweka tunapobaini kuna aina mbili za vifo – cha kimwili na kiroho. Mwili wa Adamu haukufikia tamati siku hiyo alipokula matunda. Ikumbukwe, Mungu aliwaonya waziwazi kwamba siku wakila matunda aliywakataza wangekufa “siku hiyo” (Mwanzo 2:17).

Kifo ni matengano. Kifo cha kimwilli hutokea pale roho ya binadamu inapoachana na mwili (Yakobo 2:26). Kifo cha kiroho hutokana na mtu aliye timamu anapotenda dhambi, na hivyo kutengana na Mungu. Isaya anafafanua: “Maovu yenu yamewafarikisha ninyi na Mungu wenu, na dhambi zenu zimeuficha uso wake msiuone, hata hataki kusikia” (Isaya 59:2). Kifo cha kiroho ni matengano yanayotokea pale watu wanyoofu wanapotenda dhambi, hivyo hunajisika, na kujenga ukuta kati yao na Mungu Mtakatifu.

Adamu na Hawa walipofukuzwa bustanini, bila shaka hali ya mwilli ya asili ilianza kuzeeka. Kama wangeufikia mti wa uzima “wangeishi milele” (Mwanzo 3:22). Kadhalika, kwa kuwa waliumbwa wakiwa watu wazima, wangewajibika kwa makosa yao tangu mwanzo wa

kuumbwa kwao. Hawakupata kuishi kipindi cha utoto kisha kwenda hatua inayofuata ya kupevuka toka utoto. Adamu na Hawa walikuwa watu wa kipekee. Jamii nyingine za wanadamu huanzia katika maisha ya utoto.

Je! Watoto Wamepotea?

Vipi kuhusu watoto? Je, huzaliwa wakiwa wamepotea au salama? Kwa karne nyingi mijadala imeibua hoja nyingi. Fundisho la “kurithi dhambi” ni potofu. Mara kadhaa fundisho hili hujulikana kuwa “dhambi ya asili” maana inadaiwa kuwa imetokana na dhambi ya kwanza ya Adamu iliyorithishwa kwa vizazi vyake.

Baadhi ya wanatheolojia hulitaja fundisho hili kama: “Mwanadamu amerithi upotofu.” Je, ni kweli watoto huzaliwa wakiwa wamepotoka kutokana na dhambi ya wahenga wao wa kale; ama la?

Ili tutambue maana ya msingi ya dhambi na jinsi inavyotuathiri hurahisisha kujibu swalii hili. “Kila atendaye dhambi, afanya uasi; kwa kuwa dhambi ni uasi” (1 Yohana 3:4). Zingatia kwamba dhambi ni jambo ambalo linafanywa na mtu. “roho ile itendayo dhambi itakufa” (Ezekieli 18:4). Chunguza pia katika mstari huu uhusiano wa dhambi na mkosaji. “Roho itendayo dhambi, ndiyo itakayokufa; mwana hatauchukua uovu wa baba yake, wala baba hatauchukua uovu wa mwanawewe, haki yake mwenye haki itakuwa juu yake, na uovu wake mwenye uovu utakuwa juu yake” (Ezekieli 18:20). Dhambi haihamishiki! Katika mstari huu tunajifunza kwamba si dhambi wala haki inayohamishika. Itakuwaje iwapo wewe umetenda jambo jema lakini mwingine ndio apongezwe? Isitoshe wewe usingependa kuona mtu mwingine akifanya mabaya alafu wewe ulaumike?

Aidha watoto wachanga huja duniani humu, wakiwa hawajafanya matendo mema wala mabaya. Tunaweza kusema rekodi ya matendo yao ni nyeupe. Musa aliandika habari za “watoto,” kwamba “wasiokuwa leo na maarifa ya mabaya wala mema” (Kumbukumbu 1:39). Ebu tafakari pia maneno ya Isaya. “Kwa maana kabla mtoto huyo hajajua kuyakataa mabaya na kuyachagua mema. ...” (Isaya 7:16).

Mungu alipousamehe usiangamizwe mji wa Ninawi, alimwambia Yona rehema zake juu ya “watu zaidi ya mia na ishirini elfu, wasioweza kupambanua katika mkono wao wa kulia na mkono wao wa kushoto” (Yona 4:11). Maana yake ni wazi kwamba watoto hao mia na ishirini elfu hawakustahili adhabu maana kwa umri huo, wasingeweza kubambanua mema na mabaya. Usafi wa watoto pia umeonekana wazi katika mashitaka juu ya uovu wa Yuda ile ya kale wa kutoa watoto kafara.

“Kwa sababu wameniacha mimi, ... nao wamepajaza mahali hapa damu ya wasio na hatia; nao wamemjengea Baali mahali pake palipo juu, ili kuwachoma moto wana wao, wawe sadaka za kuteketezwa kwa Baali” (Yeremia 19:4, 5; pia angalia 7:31).

Uasi wa Israeli kama huo umeandikwa pia katia Zaburi 106: “Naam, walitoa wana wao na binti zao kuwa dhabihu kwa mashetani. Wakamwaga damu isiyo na hatia, Damu ya wana wao na binti zao, Waliowatoa dhabihu kwa sanamu za Kanaani; Nchi ikatiwa unajisi kwa damu” (mst. 37, 38). Hali ya watoto kutokuwa na hatia imetajwa mara nyingi ndani ya Biblia.

Hatia Dhidi ya Matokeo

Hapa itolewe tahadhari muhimu. Wanafunzi wa Biblia lazima watofautishe kati ya madhara ya dhambi ambayo huathiri watu wengine, dhidi ya dhana ya kwamba dhambi ya mtu fulani inaweza kumpata mwingine. Moja ya mistari inayopotoshwa sana ni Warumi 5:12: "Kwa hiyo, kama kwa mtu mmoja dhambi iliingia ulimwenguni, na kwa dhambi hiyo mauti; na hivyo mauti ikawafikia watu wote kwa sababu wote wamefanya dhambi." Mwombe mtu yeoyote akusomee mstari huu, kisha akueleze ni kitu gani kiliwafikia watu wote. Ebu na wajaze neno moja tu katika nafasi iliachwa wazi "_____ ikawafikia watu wote." Mara nyingi nimetao zoezi hili jepesi. Lakini mara kadhaa, jawabu linalotolewa ni "dhambi." Huwa nawataka ikibidi wasome tena na tena, hata watakapopata jawabu sahihi – hasa kulingana na mstari huu! Nipe nafasi nichambue maneno katika fungu hili hasa yalivyotafsiriwa katika American Standard kama yalivyotajwa hapo juu – "...hivyo mauti ikawafikia watu wote..." Mstari unataja habari za "mtu mmoja" Adamu, hakika huyo aliyeingiza dhambi ulimwenguni. Lakini hausemi kwamba dhambi ilirithishwa vizazi na vizazi! Mauti iliwafikia watu wote. Kwa hiyo, sisi sote kimwili lazima tufikwe na mauti. "Na kama vile watu wanavyowekewa kufa mara moja, na baada ya kufa hukumu" (Waebmania 9:27). Ipo tofauti ya matukio kati ya kurithi madhara ya dhambi ya Adamu na kurithi dhambi ya Adamu. Jambo la kwanza kutajwa ni sahihi, na la pili si sahihi.

Mstari mwingine unaopotoshwa sana ni uandishi wa kishairi wa Daudi. "Tazama, mimi naliumbwa katika hali ya uovu; Mama yangu alinichukua mimba hatiani" (Zaburi 51:5). Mfano mmoja utatosha kufafanua upotoshaji wa fasihi hii. Akichangia fungu hili, Albert Barnes aliandika hivi:

...dhambi yake [Daudi] ilirejea nyuma siku za "kuzaliwa kwake; yaani ilikuwa nzito yenye ukakasi, ambayo kama ingetolewa maelezo – au maana yake insingelezeka – vinginevyo, itoshe tu kusema kwamba alizaliwa "mwenye dhambi."

Kwa kuichunguza Zaburi inayofanana na hiyo, tunaweza kubaini lugha iliyotumika ya kutia chumvi.

"Wasio haki wamejitenga tangu kuzaliwa kwao; Tangu tumboni wamepotea wakisema uongo" (Zaburi 58:3).

Mistari miwili hii yote hurejea maisha ya mwanadamu ya awali – yakitajwa kwa maneno: "kuja duniani," "kutungwa mimba," "tumboni," na "kuzaliwa." Kwa kutia chumvi (kimbalagha), watoto wanatajwa wamezaliwa huku "wakisema uongo." Kiuhalisia, watoto hawazaliwi wakiongea, seuze kusema uongo! Hakika, katika maisha ya mtu uongo unazungumzwa baadaye . Hasemi watoto huzaliwa huku wamepotea. Zingatia kwa makini kirai hiki: "kupotea." Kama anavyoelezea Isaya kwa dhati: "Sisi sote kama kondoo tumepotea; Kila mmoja wetu amegeukia njia yake mwenyewe..." (Isaya 53:6). Hatujazaliwa tumepotoka. Kiuhalisia hakuna anayezaliwa huku akisema uongo. Hata hivyo, tumezaliwa katikati ya maasi – ulimwengu uliojaa dhambi, na ghafla nasi tunajikuta tukipotoka.

Usalama wa Watoto

Baada ya kusema kwamba dhambi haihamishiki, na ya kwamba dhambi ni matokeo ya mwanadamu kufanya makosa, linalofuata, kwamba watoto wachanga wanaingia ulimwenguni wakiwa salama. Hatutumii neno kuokoka, maana litadokeza wanaokolewa. Hawahitaji kuokolewa kiroho au kutakaswa.

Kifo cha mtoto mchanga kinasikitisha sana! Hata hivyo maandiko yanatoa faraja kwa watoto kupokea uzima baada ya maisha haya. Hawakuwahi maishani mwao kutengana na Mungu, hakuna kikwazo mbele yao baada ya kifo. Daudi alifunga na kuomba mtoto wake alipokuwa mgonjwa. Lakini baada ya mtoto kufa, Daudi alitoa maelezo muhimu sana: “Lakini sasa amekufa nifungie nini? Je! naweza kumrudisha tena? Mimi nitakwenda kwake lakini yeye hatanirudia mimi” (2 Samweli 12:23). Daudi hazungumzii miili yao kuungana kaburini, ila uhakika wa yeye na mwanawe kuungana katika maisha yajayo!

Ni nje na kusudi la makala haya kujadili ni umri upi hasa kijana anaanza kuwajibika kwa makosa yake. Haiwezekani kutaja miaka mahsus, maana watoto wote hawapevuki katika umri mmoja katika maisha yao. Isitoshe, wanadamu pia hawawezi kujua kwa usahihi umri wa uwajibikaji sawa na Mungu. Lakini, tahadhari hii itolewe kwa wazazi na watu wengine wanaopenda masuala mazima ya kijana. Ipo tofauti kubwa sana kati ya uwezo wa kukariri ukweli na ukomavu wa kuelewa mambo. Mtoto anaweza pengine kukaririshwa mambo na kuyataja kwa kinywa kama vile “sikia, amini, tubu, kiri, na kutoswa majini,” na asielewa ukweli muhimu na kujizatiti kwa kuanza maisha ya kumtumikia Yesu kama Bwana. Iwapo mtoto ni mchanga hataelewa jinsi mimba inavyotungwa na mtoto anavyozaliwa, bila shaka hataelewa barabara bikra kuzaa mtoto au kuzaliwa mara ya pili!

Mtu anapofikia hatua ya kuwajibika hutoa hesabu mbele za Mungu. Tunaweza kuligawa neno hili kwa lengo la kusositiza: Uwezo kiakili – kuwajibika! Anapokuwa anaweza kiakili kuwajibika, anapotenda dhambi ya kwanza, mtu huyo hufa kiroho. Hali hii hujulikana kuwa “wafu kwa sababu ya makosa na dhambi zenu” (Waefeso 2:1). Mtu hahitaji kutenda dhambi nyingi ndipo awe na hatia. Kuvunja sheria moja humfanya mtu kuwa mvuja sheria (taz. Yakobo 2:10).

Dawa ya Kupotea

Jambo la kushukuru, hali ya kupotea haipaswi kuwa endelevu. Kama tulivoona mapema, kupotea kuna uhusiano na dhambi za mtu. Maana Mungu “hapendi mtu ye yote apatee, bali wote wafikilie toba” (2 Petro 3:9). Na “Mwana wa Adamu alikuja kutafuta na kuokoa kile kilichopotea” (Luka 19:10). Injili ndio tiba ya maradhi ya dhambi yaliyopo. Injili ni “uweza wa Mungu uletalo wokovu” (Warumi 1:16). Mpango wa Mungu wa ukombozi unatoa suluhisho kwa wanadamu waovu kuhamishwa toka hali ya kupotea hadi wokovuni.

Toba ni mojawapo ya masharti muhimu sana katika mchakato huu (taz. Matendo 17:30; 1 Wakorintho 6:9-11). Kukiri pia kunahitajika (Warumi 10:9, 10). Ufalme wa kiroho wenye wokovu hupatikana “katika Kristo.” “Sasa, basi, hakuna hukumu ya adhabu juu yao walio katika Kristo Yesu” (Warumi 8:1). Hatua ya mwisho ni kuingia “katika Kristo” kwa yeye aaminiye, atubuye, amkiriye Yesu kuwa Bwana, na kisha “kubatizwa katika Kristo” (Wagalatia 3:27). Yesu ana “mwili mmoja” tu, naye “mwenyewe ni “mwokozi wa mwili” (Waefeso 4:4; 5:23). Mwili huo mmoja wa kiroho huitwa pia “kanisa” (Wakolosai 1:18). Basi, hao walio “katika Kristo” hunufaika na wokovu, ambapo ni sawa na kuwa ndani ya kanisa lake. Kwa hiyo, maoni pendwa ya kuokolewa bila ya kuwa mshiriki wa kanisa si ya kibiblia.

Kupotea Milele

Jambo linalohuzunisha, watu wengi huishi kipindi salama cha utoto hadi kuingia hali ya kupotea, na hawarekebishi mahusiano yao na Mungu! Watu wengi hufuata njia inayofurahisha watu wengi.

“Ingieni kwa kupitia mlango ulio mwembamba; maana mlango ni mpana na njia ni pana iendayo upotevuni, nao ni wengi waingiao kwa mlango huo. Bali mlango ni mwembamba, na njia imesonga iendayo uzimani, nao waionao ni wachache” (Mathayo 7:13, 14).

Wanadamu wengi huonekana kuamini kwamba Mungu “amejaa upendo” na ya kwamba wengi wataokolewa. Kwa maelezo ya Yesu hatima ya watu wengi ni kupotea!

“Wakati wa kufunuliwa kwake Bwana Yesu kutoka mbinguni pamoja na malaika wa uweza wake. Katika mwali wa moto; huku akiwalipiza kisasi wao wasiomjua Mungu, na wao wasiotii Injili ya Bwana wetu Yesu; watakaoadhibiwa kwa maangamizi ya milele, kutengwa na uso wa Bwana na utukufu wa nguvu zake” (2 Wasethalonike 1:7-9).

Idadi kubwa ya watu – watatengwa na Mungu milele. Ni hatari sana kutengwa na Mungu milele (Mathayo 25:46). Hata kwa kulitafakari tu jambo hili linasumbua, jitihada nyingi zimefanyika kufafanua hili. Kauli isiyo ya kibiblia ya Toharani (mahali pa mateso ya muda) ni ya udanganyifu yenye lengo la kutoa matumaini kwa wapendwa waliokufa bila ya kujiandaa.

Upotoshaji mwingine ni sala kwa wafu kujaribu kubadili hatima ya aliyekufa. Fungu linalotaja mtu “kubatizwa kwa ajili ya wafu” halifundishi kwamba mtu hai anaweza kubadili hatima ya kiroho ya mtu aliyekufa tayari (1 Wakorintho 15:29).

Bahati mbaya, hata baadhi ya watoto wa Mungu wanajaribu kutafuta tiba nyingine ya dhambi kinyume na kutii injili. Mawazo kuhusiana na hali ya kupotea kwa wapendwa na marafiki zetu hakika yanashumba. Pia mawazo kuhusiana na jamaa wa madhehebu kupotea, ambaao mara nyingi hudhihirisha bidii nyingi kuliko hata baadhi ya wanaomilikiwa na Bwana, hakika yanashumba. Lakini, msingi wa fikira zetu usipojengwa juu ya Maandiko, hisia zetu zinaweza kuwa kinyume na kweli.

Mambo yakiwa hivyo, unaweza kusikia Mkristo akifikiri kwamba kwa namna fulani Bwana atawakubali hao ambaao hawakujifunza na kuitii kweli. Akili iliyochanganyikiwa inaweza kudhani kwamba kwa kuwa watu wengi ni wajinga, basi hawatawajibika.

Je! ujinga ni tiketi ya kuingia katika raha ya milele? Paulo alinena: “Ingawa zamani za ujinga Mungu alijifanya haoni; bali sasa anawaagiza watu wote wa kila mahali watubu” (Matendo 17:30 Williams). Petro akiwa mbele ya umati wa Wayahudi alilibaini hili: “najua ya kuwa mliyatenda haya kwa kutokujua kwenu” – yaani, hao “mkamwua yule Mkuu wa uzima” (Matendo 3:17, 15). Lakini ingawa walitenda hivyo bila kujua, hata hivyo aliagiza: “Tubuni basi, mrejee, ili dhambi zenu zifutwe, zipate kuja nyakati za kuburudishwa kwa kuwako kwake Bwana” (Matendo 3:19). Hata katika ujinga, watu huwajibika! Ukweli unaweza kudhihirika! Yesu alisema: “tafuteni, nanyi mtaona” (Mathayo 7:7). Tunaweza kuijua kweli! “Tena mtaifahamu kweli, nayo hiyo kweli itawaweka huru” (Yohana 8:32).

Mshangao Siku ya Hukumu

Maneno ya Bwana yanaweza kuifanya akili iliyokuwa ikitangatanga ifikiri vema.

“Si kila mtu aniambiaye Bwana, Bwana, atakayeingia katika ufalme wa mbinguni, bali ni yeye afanyaye mapenzi ya Baba yangu aliye mbinguni. Wengi wataniambia siku ile, Bwana, Bwana, hatukufanya unabii kwa jina lako, na kwa jina lako kufanya miujiza mingi? Ndipo nitawaambia dhahiri, Sikuwajua ninyi kamwe; ondokeni kwangu, ninyi mtendao maovu” (Mathayo 7:21-23).

Ni vema kuyachunguza maneno haya kwa uangalifu mkubwa ili kubaini ni nani mlengwa hasa hapa. Siku hiyo ya hukumu watu waliokuwa wakijishughulisha na masuala ya dini na kulitaja jina la Bwana watapatwa na mshituko. Ni watu gani hao? Kwanza, ni watu wa dini. Pili, wanaonekana walimsifu Bwana kutokana na mambo waliyokuwa wakifanya. Zaidi ya hayo, wanajitokeza wakitarajia kukubaliwa na Bwana. Kwa kuwa maelezo ni mengi, hakika matumizi yake pia ni mapana. Lakini, kweli kabisa watu wengi leo katika ulimwengu wa Kikristo wanakidhi vigezo hivi. Maelfu ya watu wa madhehebu wamejitoa kusali, kusoma Biblia, pamoja na shughuli zingine nyingi za kidini.

Mara nyingi hujishughulisha sana na kutoa hisani na wakijitanabaisha kuwa wanafanya hayo yote kwa “jina la Yesu.”

Lakini maswali mazito yanapaswa kuulizwa. Kweli waumini wa madhehebu wanatenda mapenzi ya Mungu wa mbinguni? Je! wametakaswa kiroho? Kwa uwazi kabisa Petro anatueleza kwamba utakaso wa mtu hutokea kwa “kuitii kweli” (1 Petro 1:22). Wanawezaje kuwa ndani ya Kristo mahali ambapo “hakuna hukumu” ikiwa hawajawahi kubatizwa na kuingizwa “katika Kristo” (Warumi 8:1; Wagalatia 3:27)?

Waumini wa madhehebu wanafanana na Sauli kabla ya uongofu wake. Alikuwa na bidii akitenda aliyodhani kuwa sahihi mbele za Mungu. Kwa dhamiri safi alidhani ilimpasa “kutenda mambo mengi yaliyopingamana na jina lake Yesu” (Matendo 26:9). Huku akifikiri anampendeza Mungu, Yesu akakabili ana naye na kumwuliza: “Sauli, Sauli, mbona waniudhi?” (Matendo. 9:4). Vilevile, idadi kubwa mno kwa dhamiri safi wanadai mtoto anazaliwa akiwa amepotoka, wokovu ni kwa “imani tu” (taz. Yakobo 2:24), na mafundisho kadha wa kadha yasiyo ya kibiblia.

Si wewe wala mimi niliyeketi katika kiti cha hukumu cha Yesu. Hapo ni mahali pa Bwana (2 Timotheo 4:1)! Lakini Yesu ametuonya jinsi hukumu yake itakavyokuwa juu yao walio na bidii kidini, lakini hawatendi mapenzi ya Baba. Hakimu ameshatueleza tayari maamuzi yake yatavyokuwa. “Aaminie na kubatizwa ataokoka; asiyeamini, atahukumiwa” (Marko 16:16). Mungu “ambaye hutaka watu wote waokolewe, na kupata kujua yaliyo kweli” (1 Timotheo 2:4). Hatuwezi kuupata wokovu tusipokuwa na elimu sahihi.

Huruma Inayoongozwa na Kusadikika

Hatuna budi kuzidhibiti hisia zetu zinazotafuta kusifiwa. Hali ya kuona mtu mmoja amepotea itusumbue. Lakini, hamasa hiyo haipaswi katuongoza katika kuitafuta njia nyingine mbadala ya kuokoka, au “watu wema” kwenda mbinguni kuititia mlango wa nyuma.

Pengine umewahi kusikia mtu akisema: “Siamini kwamba Mungu atampeleka mahali pa mateso milele mtu yeoyote!” Uchambuzi wa kauli hii huibua tatizo – “Siamini...! Kutoamini kwao hakutabadilisha maneno ya Yesu: “Na hao watakwenda zao kuingia katika adhabu ya

milele; bali wenye haki watakwenda katika uzima wa milele” (Mathayo 25:46)! Ukweli huu utuhamasisce kuinena injili ya Bwana. Injili ni ujumbe wa matumaini!

Pindi mtu anapokuwa hai, hapaswi kuendelea na hali yake ya kupotea. Pia elimu inayohusu hatari ya kutengwa na Mungu iwashe moto ndani yetu utakaotushurutisha tupeleke ujumbe wa Bwana Yesu Kristo. Uwe mwaangalifu kwamba hamasa ya uinjilisti kwa Mkristo inaweza kuzimika pale mtu anaposhindwa kubaini ukweli kwamba bila injili waliopotea dhambini watabaki hali hiyo ya kupotea.

Tunahitimisha insha hii kwa kisa hiki chenye kifikirisha. Jambo hili hutokea mara chache, watu hufurahia kuogelea majini hadi hapo hofu inapowapata. Wanaanza kupiga yowe – “Nisaidie, Nisaidie!” Wanao wasimamia, kikawaida bila ya kupoteza muda, pasipo kusubiri wanajitosa majini na kujaribu kumsaidia mtu anayezama. Kwanini? Kwa sababu wanajua hitaji la dharura la kumwokoa mtu huyo na ya kwamba atakufa kama msaada hautatolewa haraka.

Jel! tunaamini kabisa kwamba watu wanaotuzunguka wamepotea dhambini, na wapo katika hatari ya kupotea milele? Kama hivyo ndivyo, tunapaswa kuwafikia na ujumbe wa matumaini. Yesu alikuwa tayari kuiacha mbingu na kuuendea msalaba ili njia ya wokovu ipatikane (taz. Wafilipi 2:5-8). Hakika upo uhusiano kati ya tunavyoamini wengine wamepotea na tunavyowapelekea injili.

George Jensen

Tanzania, East Africa, 2021

Imetafsiriwa na: Christopher Mwakabanje

Marejeleo: Albert Barnes. Psalms: Volume 1, Barnes' Notes (Grand Rapids: Baker, 1998) 85.